

宋史新編

宋史新編卷一百六十八

列傳一百十

明南京戶部主事莆田柯維騏著

循吏

天子統御兆民所資以共理者吏也吏不擇人譬如土偶被文繡何益於事甚者如猛虎毒蛇民其能堪乎漢唐循吏之效尚矣宋懲五季藩鎮之弊著令朝臣出知州縣躬召詢政事乃遣或詔侍從保薦以充勝任與否則督監司糾舉或命使者廉察有佳政則賜璽書賚錢帛或寵以章服其慎重如此累朝相承在位咸蒸蒸不懈而樹有成績以贊仁厚之治者史不絕書亦云盛哉

茲從舊述得十有二人他不但以惠稱者見別傳

陳靖

張綸

邵曄

崔立

魯有開

張逸

吳遵路

趙尚寬

高賦

程師孟

韓晉卿

葉康直

陳靖字道卿莆田人好學頗通古今父仁璧仕陳洪進
爲泉州別駕洪進稱臣豪猾有負險爲亂者靖徒步謁
漕使陳討賊策召還授陽翟縣主簿契丹犯邊靖上五
策曰明賞罰撫士衆持重示弱待利而舉帥府許自辟
上而將帥得專制境外太宗與之改將作監丞歷太常
博士太宗務興農事詔右司議均田法靖議曰法未易

遂行也宜先命大臣或三司使爲租庸使或兼屯田制
置仍擇三司判官選通曉民事者二人爲之貳兩京東
西千里檢貢荒地及逃民產籍之募耕作賜耕者室廬
牛犂種食別其課爲十分貢州縣勸課分殿最爲三等
候數歲盡罷官屯田悉用賦民然後量入授田度地均
稅太宗謂呂端曰朕欲復井田顧未能也靖此策合朕
意乃召見賜食遣之他日帝又語端下三司雜議群議
不同始罷之出靖知婺州再遷尚書刑部員外郎真宗
卽位復列前所論又言國家禦戎西北而仰食東南東
南食不足則誤國大計請自東西及河北諸州大行勸

農之法歲可省江淮漕百餘萬又下三司議皆不果行
歷河南轉運使極論前李氏橫賦於民凡十七事詔爲
罷其尤甚者徙知潭州歷度支鹽鐵判官累遷太僕卿
集賢院學士知建州徙泉州拜左諫議大夫初靖與丁
謂善謂貶黨人皆逐去提點刑獄侍御史王耿乃言靖
老疾不宜久爲鄉里官於是以祕書監致仕卒靖平生
多建畫而於農事尤詳嘗上勸農奏議錄然其說泥古
多不可行

張綸字公信汝陰人少倜儻任氣舉進士不中補三班
奉職遷右班殿直從雷有終討王均于蜀以功遷右侍

禁慶州兵馬監押歷內殿崇班知鎮戍軍辰州溪峒蠻
屢入寇以綸爲辰州澧鼎等州緣邊五溪十峒巡檢安
撫使綸諭蠻酋禍福購還所掠民遣官與盟刻石于境
上時嘉祐二年也久之除江淮制置發運副使奏除鹽
課宿負官助其器用入者優其直由是歲增課數十萬
石復置鹽場于杭秀海三州歲入課又百五十萬疏五
渠導太湖入于海復租米六十萬開長廬西河以避覆
舟之患又築漕河隄二百里于高郵北旁銅鉅石爲十
礎以泄橫流泰州捍海舊堰壞歲患濤冒民田綸表請
修復命兼權知泰州遂成堰凡百五十里復通戶三千

州民利之爲立生祠累遷東上閣門使真拜乾州刺史徙知潁川卒綸有材略而性仁恕在江淮見漕卒凍餒道死推奉錢市絮襦千數衣其不能自存者

邵曄字日華京兆人家桂陽幼嗜學恥從辟署太平興國八年登進士第歷蓬州錄事叅軍時楊全知州性悍率部民張道豐等三人被誣爲劫盜曄察其枉不署牘白全核實全不聽引抵法不服旣而捕獲正盜三人遂得釋全坐削籍爲民曄代還引對太宗嘉獎賜錢五萬詔以全事戒諭天下授曄光祿寺丞歷遷工部員外郎淮南轉運使景德中假光祿卿充交趾安撫國信使會

龍鉞之變曄以事聞改命爲沿海安撫使許以便宜設
方略曄貽書諭朝廷威德俾速定位卽聽命使還改兵
部員外郎賜金紫嘗上邕州至交州水陸路及宜州山
川等四圖頗詳控制之要俄判三司三勾院坐所舉李
隨犯贓當削二官上以其遠使之勤令停任後起知兗
州歷右諫議大夫知廣州州城瀕海每蕃舶至岸常苦
颶風曄鑿內濠通舟颶不能害未幾卒年六十三

崔立字本之鄆陵人祖周度仕周爲泰寧軍節度判官
慕容彥超叛周度以大義責之遂見殺立登進士第歷
官知江陰軍屬縣有利港久廢立濬治溉田數千頃及

開橫河六十里通運漕累遷太常少卿歷知棣漢相潞
兗鄆涇七州立性淳謹尤喜論事祥符封禪士大夫爭
奏符瑞獻贊頌立獨言水發徐州旱連江淮無爲烈風
金陵火天所以警驕惰戒淫佚也區區符瑞尚何足爲
治道言哉前後上四十餘事以右諫議大夫知耀州改
知濠州遷給事中告老進尚書工部侍郎致仕卒立識
韓琦於布衣以女妻之人服其鑒云

魯有開字元翰用從父宗道蔭入官歷知確山縣富弼
守蔡薦之以爲有古循吏風知金州有蟲獄當死者數
十人有開曰安得若是衆邪訊之則誣天方旱獄白而

雨知南康軍代還熙寧行新法王安石問江南如何曰
法新行未見其患當在異日也以所對乖異出通判杭
州知衛州徙冀州增河隄或謂郡無水患何以役爲對
曰豫備不虞古之善計也卒成之明年河決水果至不
能冒隄而止朝廷遣使河北民遮誦有開功狀召爲膳
部郎中元祐中歷知信陽軍洛滑州復守冀官至中大
夫卒

張逸字大隱滎陽人進士及第知襄州鄧城縣知州謝
泌將薦逸設几案置章其上望闕再拜曰老臣爲朝廷
得一良吏他日引對真宗問所欲何官逸對曰母老在

家願得近鄉幕職授澶州觀察推官母喪服除引對帝
又固問之對曰願得京官特改大理寺丞用泌薦也知
長水縣徙青神縣縣東南有松栢灘夏秋暴漲多覆舟
逸禱江神不踰月灘爲徙五里時人異之累遷尚書兵
部郎中知開封府有僧求內降免田稅而逸固執不許
仁宗曰有司能守法朕何憂也以樞密直學士知益州
逸凡四至蜀諳其民風華陽騶長殺人誣道旁行者縣
吏受財獄旣具乃使殺人者守囚逸曰囚色冤守者氣
不直豈守者囚始敢言而守者果服立誅之蜀人以爲
神卒于官

遵路字安道父淑見文苑傳遵路第進士累官祕閣
校理章獻太后稱制下莫敢言遵路條奏十餘事忤太
后意出知常州嘗預市米吳中以備歲儉已而果大乏
食民賴以濟自他州流至者亦全十八九累遷兵部郎
中權知開封府時宋庠鄭戩葉清臣皆宰相呂夷簡所
不悅遵路與三人雅相厚善夷簡忌之出知宣州上禦
戎要略邊防雜事二十篇遷龍圖閣直學士知永興軍
被病猶決事不輟手自作奏及卒仁宗聞而悼之遵路
博學知大體母喪廬墓蔬食終制性夷雅慎重寡言笑
善筆札其爲政簡易立朝敢言平居廉儉無他好身後

室無長物子瑛爲尚書比部員外郎不待老而歸

趙尚寬字濟之河南人安仁子也知平陽縣鄰邑有大
囚十數破械夜逸殺居民將犯境尚寬悉獲之知忠州
大化其俗嘉祐中以考課第一知唐州唐素沃壤經五
代亂土曠民稀賦不足以充役議者欲廢爲邑尚寬曰
土曠可益墾辟民稀可益招徠何廢郡之有乃按視圖
記得漢召信臣陂渠故迹益發卒復疏三陂一渠溉田
萬餘頃又教民自爲支渠數十轉相浸灌而四方之民
來者雲布尚寬復請以荒田計口授之三司使包拯與
部使者交上其事仁宗下褒詔仍進秩賜金留唐凡五

年民像以祠而王安石蘇軾作新田新渠詩以美之徙
同宿二州又徙梓州尚寬去唐數歲田日加闢戶日益
衆朝廷推功自少府監以直龍圖閣知梓州積官至司
農卿卒詔賜錢五十萬

高賦字正臣中山人以父任爲右班殿直復第進士改
奉禮郎因遷太常博士歷知真定縣通判劍邢石州成
德軍知衢州俗尚巫鬼民毛氏柴氏二十餘家世蓄蠱
毒值間歲害人尤多忿爭者輒遭其毒賦悉擒治伏辜
蠱患遂絕徙唐州州田經百年曠不耕前守趙尚寬菑
墾不遺力而榛莽者尚多賦繼其後益募兩河流民計

口給田作陂堰四十四畝滿畝留比其去田增闢三萬一千三百餘頃戶增萬一千三百八十歲益稅二萬二千二百五十七璽書褒諭宣布治狀以勸天下兩州爲生立祠歷蔡潞二州入同判太常寺進集賢院學士在朝累有建明神宗多施行之以通議大夫致仕卒年八十四

程師孟字公闢吳人舉進士甲科累官知南康軍楚州提點夔路刑獄夔部無常平粟建請置倉迫凶歲振民不足卽矯發他儲不俟報申懼白不可師孟曰必俟報餼者盡爲殍矣竟發之徙河東路晉地多土山旁接川

夏大雨水濁如黃河俗謂之天河可溉灌師孟勸
民出錢開築築堰淤良田萬八千頃裒其事爲水利圖
經頒之州縣爲度支判官知洪州歷江西轉運使加直
昭文館知福州治行最東南徙廣州州城爲儂寇所毀
師孟作西城及交趾陷邕管間廣守備固不敢東時師
孟已召還朝廷念前功以爲給事中集賢殿修撰判都
水監賀契丹生辰至涿州與迎者抗禮不爲屈明日涿
人餞于郊疾馳不顧涿人移雄州以爲言坐罷歸起知
越州青州遂致仕以光祿大夫卒年七十八師孟累領
劇鎮爲政簡而嚴發隱櫛伏如神豪惡不逞跌宕者必

痛懲艾之至勦絕乃已洪福廣越爲立生祠

韓晉卿字伯修安丘人以五經中第歷官知同州壽州
奏課第一擢刑部郎中元祐初知明州兩浙轉運使差
役法復行諸道處畫多倉卒失敘獨晉卿視民所宜而
不戾法指連遷大理卿元豐置大理獄多內庭所付晉
卿持平考核無所上下神宗稱其才嘗被詔按治寧州
獄循故事當入對晉卿曰奉使有指三尺法具在豈應
刺候主意輕重其心乎受命卽行議者欲引唐日覆奏
令天下庶獄悉奏決晉卿言可疑可矜者許上請祖宗
之制也四海萬里必須繫以聽朝命恐自今瘐死者多

於伏辜者矣朝廷皆行其說士大夫推其忠厚不以法
家名之卒于官

葉康直字景溫建州人登進士第知光化縣時豐稷爲
穀城令亦以治績顯人歌之曰葉光化豐穀城清如水
平如衡曾布行新法以爲司農屬歷陝西提點刑獄轉
運副使五路兵西征康直領涇原糧道內侍梁同以餉
惡妄奏神宗怒將誅之王安禮力救得歸故官元祐初
加直龍圖閣知秦州中書舍人曾肇蘇轍劾康直諂事
李憲免官究實無狀改知河中府復爲秦州進寶文閣
待制陝西都轉運使以疾請知亳州通濬積潦民獲田

數十萬畝召爲兵部侍郎卒年六十四

新編卷一百六十八

宋史新編卷一百六十九

列傳一百十一

明南京戶部主事莆田柯維騏著

文苑

古之文也質而典奧而不晦西漢世邇矩法猶存東漢迄五季愈變愈卑其振俗而追之古者千年間不過數人而已宋初楊億劉筠擅才藻未脫聲律之習柳開穆脩志欲變古而力弗逮仁宗朝歐陽脩以古文倡學者翕然宗之曰歐陽子今之韓愈而曾鞏蘇軾又踵和之不幸宣政爭尚靡麗至孝宗昇平名儒迭出復崇雅正號乾淳體合一代觀之斯文亦云盛矣若詩人則有梅

堯臣黃庭堅秦觀陳師道陳與義輩亦一切名家夫詞章固未藝然非閱覽深研則莫能工況多出於節行之士哉茲錄槩因舊史其歐曾蘇三子見別傳

宋白

梁周翰

朱昂

趙隣

幾何承裕附

鄭起

郭昱馬應

和峴

弟嶸附

馮吉

高順

李度

韓溥

鞠常

宋準

柳開

夏侯嘉正羅處約

安德裕

錢熙

陳充

吳淑

舒雅

黃夷簡

盧植謝炎許洞附

宋白字太素大名人建隆二年進士甲科乾德初獻文百軸試拔萃高等解褐授著作佐郎知蒲城衛南二縣

宗潛藩白贇文卽位擢左拾遺權知兗州歷翰林學士雍熙中召白與李昉集文士纂文苑英華一千卷後加禮部侍郎三掌貢士頗致譏議白嘗過何承矩家方陳倡優飲宴有進士趙慶素無行游承矩門因潛出拜白求薦後慶遂有名張去華坐尼安道貶白爲同年生厚善遂出白保大軍節度行軍司馬踰年抗疏自陳有來日苦少去日苦多之語太宗憫之召還累遷戶部侍郎兼祕書監真宗改吏部侍郎判昭文館先是白獻擬陸贄勝子集意求任用乃命知開封府試之旣而白倦聽斷求罷拜禮部尚書白學問宏博屬文敏贍然辭意

放蕩少法度在內署久厭番直草辭疎略不愜旨景德
二年與梁周翰俱罷拜刑部尚書集賢院學士未幾引
年以兵部尚書致仕進吏部尚書卒贈左僕射錄其後
三人白贍濟親族文藝之士極意稱獎故爲時彥所宗
進士陳彭年輕俊喜朝謗白惡而黜之彭年旣顯爲貢
舉條制多所關防蓋爲白設也會有司謚白文憲內出
密奏言曰素無檢操遂改文安有集百卷

梁周翰字元褒管城人周第進士歷開封府戶曹參軍
宋爲祕書郎直史館高錫䟽議太公配享諸賢內王僧
辨恐非全德尋詔重銓定終始無瑕者方預焉周翰上

言天地以來覆載之內聖賢交驚古今同流校其顛末
鮮克具美周公聖人也盛德大勳蟠天極地外則淮夷
構難內則管蔡流言寔尾跋胡垂至顛頓偃禾仆木僅
得辨明此可謂之盡美哉臣以爲非也孔子聖人也祖
述堯舜憲章文武雖試用於定哀曾不容於季孟又嘗
履盜跖之虎尾聞南子之佩聲遠辱慎名未見其可此
又可謂其盡善哉臣以爲非也自餘區區後賢瑣瑣立
事比於二聖曾何足云而欲責其磨涅不渝始卒如一
者臣竊以爲難其人矣昉自唐室崇祀太公武臣陪饗
廟貌如文宣之制事雖不經義足垂勸況於曩日不乏

通賢疑難討論亦云析中今若求其考類別立否臧以
羔袖之小疵忘狐裘之大善恐其所選僅有可存景行
高山更奚瞻於往躅英魂烈魄將有恨於明時願納微
忠特追明敕不報乾德中獻擬制二十篇擢爲右拾遺
會修大內上五鳳樓賦人多傳誦之五代以來文體卑
弱周翰與高錫柳開范杲習尚淳古齊名友善當時有
高梁柳范之稱歷通判綿眉二州坐杖人至死奪二官
起授太子左贊善大夫開寶三年遷左拾遺監綾錦院
改左補闕兼知大理正事俄坐杖錦工過差爲其所訴
太祖甚怒責之曰爾豈不知人之膚血與已無異何乃

遽爲酷罰將杖之周翰自言臣負天下才名不當如是
太祖乃解止授左司農寺丞逾年爲太子中允太平興
國中知蘇州周翰善音律喜誦博惟以飲戲爲務以本
官分司西京踰月授左贊善大夫仍分司俄除楚州團
練副使雍熙中歷遷起居舍人兼起居郎會考課京朝
官有敢隱前犯者皆除以爲民周翰被譴尤多所上有
司偶遺一事當免判館楊徽之率三館學士詣相府以
爲周翰非故有規避其實所犯頻繁不能悉記於是止
罰金百斤至道中遷工部郎中真宗在儲宮知其名徵
之時爲左庶子因令取所爲文周翰悉纂以獻上答以

書及卽位首擢駕部郎中知制誥俄判史館昭文館不
數年召入翰林爲學士歷工部侍郎卒帝憫之錄其
周翰性疎雋下急臨事嚴暴故多曠敗晚年才思稍減
書詔多不稱旨有集五十卷及續因話錄

朱昂字舉之其先京兆人徙家南陽父葆光家衡山昂
少與熊若谷鄧洵美同學朱遵度好讀書人號之爲朱
萬卷昂爲小萬卷北游江淮韓令坤署權知楊州楊
子縣便宜綏輯復通亡者七千餘家令坤卽表授本縣
令宋初爲衡州錄事參軍嘗讀陶潛閑情賦而慕之因
廣其辭曰維稟氣兮清濁獨得意兮虛徐耳何聰兮無

瑱衣何散兮無裾務冥懷於得喪寧勤體乎菑畚將使
同方姬孔抗跡孫遽精驚廣漠心游太虛傲朝曦兮南
榮遡夕飈兮北疏非道之病惟情之舒絲是含穎懷粹
凝和習懿器齋淪兮幽憂德芬馨兮周比并無渠兮泉
融珠潛輝兮川媚又何必陋雄之尚玄笑奕之心醉悲
墨之素絲嘆展之下位苟因時之明揚乃斯文之不墜
睇烟景兮飄飄心懸旌兮搖搖感朝榮而夕落嗟響蛩
而鳴蜩姑藏器以有待因寄物而長謠願在首而爲弁
束玄髮而未衰會名器之有得與纓珥兮相宜願在足
而爲舄何坎險之罹憂欲效勤於豎亥思追踵於浮丘

願在服而爲袂傅繒素而飾躬異化緇之色涅寧拭而
而道窮願在目而爲鑑分妍醜於崇朝驚青陽之難久
庶白首以見招願在地而爲簞當暑溽而冰寒伊膚革
之尚疚胡寤寐以求安願在觴而爲醴不亂德而溺真
體虛受之爲器革謫性以歸淳願在握而爲劍每輔衽
而保裾殊鉛銛之效用比研刃而有餘願在橐而爲矢
美箬羽之斯全疇懋勳而錫晉射窮壘而劔燕願在體
而爲裘託針縷以成功非珍華而取飾將被服而有容
願在軒而爲篁貫歲寒而不改挺介節以自持廓虛心
而有待人之願兮寔繁我之心兮若此蓄爲志兮璞藏

發爲文兮霧委旣持瑾兮掌瑜復傾蘭兮執芷始無言
兮植杖終俛首兮嗟髀振襟兮自適覲物兮解頤雲無
心兮遐舉蘿倚榦兮叢滋想陵谷之變地况玄黃之易
絲人可汰而可鍛已不磷而不緇苟一鳴而驚人何五
鼎而勿飴已而擁膝清嘯傾懷自寬樞桑戶革兮差樂
鳩飛駿躍兮胡難指夜蟾兮爲伍仰疎籟兮邀歡何孫
牧而伊耕何巢箕而呂磻滌我慮兮綠綺清我眠兮琅
玕周旋兮有則徙倚兮可觀終卷舒兮自得契休哉於
考槃累遷監察御史江南轉運副使太宗累遷水部郎
中直祕閣兼越王府記室叅軍眞宗累遷翰林學士踰

年拜章乞骸骨乃拜工部侍郎致仕昂前後所得奉賜以三之一購奇書以諷誦爲樂及是閒居自稱退叟著資理論三卷上之晚歲自爲墓誌卒年八十三詔加賻贈錄其孫門人謚曰正裕先生昂好學純厚有清節澹於榮利進退有禮士類多之有集三十卷子正彝正辭並登進士第正基虞部員外郎

趙隣幾字亞之須城人家世爲農隣幾少好學嘗作禹別九州賦萬餘言人多傳誦在周第進士解褐祕書省校書郎歷許州宋州從事太宗召爲左贊善大夫直史館改宗正丞後郭贇宋白薦之而帝又嘉其所獻頌遷

左補闕知制誥數月卒年五十九隣幾常欲追補唐武宗以來實錄訪求遺事殆廢穀食會疾革唯以書未成爲恨淳化中太宗取其書得隣幾所補會昌以來日曆二十六卷及文集三十四卷所著鰕子一卷并他書來上皆塗竄之筆也詔賜其家錢十萬時又有何承裕者晉天福末擢進士第有清才好爲歌詩而嗜酒狂逸累官至著作佐郎直史館出爲蓋屋咸陽二縣令醉則露首跨牛趨府尹王彥超以其名士而容之然爲治清而不煩民頗安焉後歷侍御史累知忠萬商三州卒鄭起字孟隆不知何許人少佻薄無檢操聞襄州僧能

爲黃金遂削髮爲侍者久之知其誑耀乃反初服舉進士時舉子多尚詩賦惟起有文七軸歌詩尤清麗爲縣簿秩滿以書干周宰相范質薦爲右拾遺直史館乾德初自殿中侍御史出掌泗州市征忤刺史張延範奏起嗜酒廢職黜爲河西令會蜀平當徙遠官起不欲往多恪其足因是成疾卒起負才倨傲多詆訐數爲羣小窘辱終不改時有郭昱者好爲古文俠中詭僻在周登進士第恥赴常選獻書宰相趙普曰比巢由朝議惡其矯激故又不調後復伺普望塵自陳普笑謂人曰今日甚榮得巢由拜於馬首開寶末詣普居正上書極言謗普

居正奏之詔署襄州觀察推官潘美鎮襄陽討金陵以
昱隨軍昱中夜被酒號呌軍中皆驚翌日遣還歲餘坐
盜官錢除名卒又有馬應者薄有文藝服道士衣自稱
先生開寶初倣元結中興頌作勃興頌以述太祖下荆
湖之功欲刊石於朮州結頌之側縣令惡其夸誕不以
聞太平興國初登第授大理評事坐事除名淳化中以
詩于同年殿中丞牛景景因奏上太宗覽而嘉之復舊
官未幾卒又有顏贊董淳劉從義善爲文張翼譚用之
善爲詩張之翰善牋啓贊拔萃登科至太子中允淳爲
工部員外郎直史館奉詔撰孟昶紀事從義多藏書嘗

纂長安碑文爲遺風集二十卷餘皆官不達

和峴字晦仁浚儀人晉宰相魯國公凝之子以蔭歷太常丞宋初授太常博士俄拜刑部員外郎兼博士仍判太常寺乾德二年孝明孝惠二后神主祔別廟三年十二月蜡百神峴皆獻議從之又嘗言朝會登歌用五瑞郊廟奠獻用四瑞凡諸樂之議竝從之事具禮樂志先是王朴竇儼洞曉音樂前代不協律呂者多所考正朴儼旣沒未有繼其職者會太祖以雅樂聲高詔峴講求其理以均節之自是八音和暢上甚嘉之語具律志開寶初遷司勳員外郎歷夔晉二州通判太宗卽位遷主

客郎中歷京東轉運使峴性苛刻鄙吝好殖財復輕侮人嘗以官船販易規利坐削籍配隸汝州起爲太常丞分司西京端拱初上躬耕籍田峴表賀至闕下因以其所著奉常集五卷祕閣集二十卷注釋武成王廟贊五卷奏御上甚嘉之復授主客郎中判太常寺兼禮儀院事未幾卒弟嶠

嶠字顯仁凝第四子也太平興國八年登進士第釋褐霍丘主簿歷光祿寺丞先是凝嘗取古今史傳斷獄雪冤事著爲疑獄集嶠因增益事類分爲三卷表上之俄獻所著文賦五十軸召試中書擢爲太子中允淳化初

補注疑所撰古今孝悌集成十卷以獻遂以本官直集
賢院中謝日賜緋魚三年春獻觀燈賦遷右正言太宗
謂李昉曰蒙宰相子勤學自立有文章能荷堂構如蒙
者不可多得也以本官知制誥不踰年加水部員外郎
知理檢院至道元年賜金紫與王旦同判吏部銓是秋
晨起將朝風眩暴作卒上聞之驚嘆賙加等錄其二
孤蒙奸修飾容儀自五鼓張燈燭至辨色冠帶方畢上
嘗欲召入翰林不果蒙弟嶧始爲三班奉職淳化中獻
文求試上以故相之後改授大理評事

馮吉字惟一洛陽人周太師中書令道之子以父任歷

太常少卿吉瑒學善屬文工草隸然性滑稽無操行每
中書舍人缺宰相卽欲用吉終以佻薄而止雅好琵琶
尤臻其妙父常戒令勿習不能改道欲辱之因家宴令
吉奏琵琶爲壽賜以束帛吉置於肩左抱琵琶按膝再
拜如伶官狀了無忤色家人皆太笑及爲少卿頗不得
意以杯酒自娛每朝士宴集雖不召常自至酒酣彈琵
琶已復賦詩詩成起舞人愛其俊逸謂之三絕宋初受
詔撰述明憲皇太后諡議見稱於時云

高頔字子奇雍丘人後唐舉進士乙科四遷魏博觀察
支使周顯德中符彥卿奏署掌書記時太宗親迎懿德

皇后于大名彥卿遣頤迎候日夕陪接尤伸款好後隨
彥卿鎮鳳翔會詔留彥卿洛陽頤復爲天雄軍掌書記
以病免雍熙中頤年八十餘太宗親試貢士頤子南金
舉學究自陳願賜一第庶獲寸祿及老父上問左右其
父何人宰相宋琪以頤對且言其素行縉紳推重上曰
此高頤子耶頤在大名幕中嘗與朕遊處迨踰旬月晨
暮對按飲食常拱手危坐未嘗少懈其恭謹蓋天性也
惜老矣不欲煩以官政卽擢南金第拜頤左補闕致仕
賜錢一萬卒于家頤有清節力學彊記手錄書千餘卷
所乘馬老以糜飼之僕夫年七十待之如初時稱其長

首次子鼎第進士至殿中丞

李度洛陽人周顯德中第進士度工於詩有醉輕浮世
事老重故鄉人之句時翰林學士中文炳知貢舉樞密
使王朴移書錄其句以薦之文炳卽擢度爲第三人累
遷殿中丞知欽州坐事左遷絳州團練使十年不調度
在欽州嘗以所著詩刻於石有中黃門得其石本傳入
禁中太宗見之謂宰相曰度今安在卽令召至對於便
殿與語甚悅擢爲虞部員外郎直史館賜緋端拱初交
州黎桓加恩度借太常少卿爲副使上賜詩寵行未至
交州卒于傳舍弟康亦善詩登進士第

韓濟京兆長安人唐相休之裔孫周顯德初第進士歷
司門郎中溥詳練臺閣故事多知唐朝氏族與人談亶
亶然可聽號爲近世肉譜縉紳頗推重之尤善筆札人
多藏其尺牘弟洎亦進士及第

鞠常字可久高密人父慶孫申州團練判官有詩名常
漢乾祐二年登進士第釋褐祕書省校書郎周廣順中
宰相范質奏充集賢校理出爲鄆州觀察支使歷數縣
令開寶中趙普爲相擢爲著作佐郎時任此官惟常與
楊徽之李若拙趙隣幾四人皆有名於時常應舉時著
四時成歲賦萬餘言又爲春蘭賦頗存興託後爲清江

介卒子仲謀雍熙中進士弟愉周廣順中進士與常齊名

宋準字子平雍丘人祖父俱爲京朝官準開寶中登進士甲科貢士徐士廉擊登聞鼓訴知舉李昉用情取拾太宗怒召準覆試便殿見準形神偉茂程試敏速甚嘉之以爲宜首冠俊造由是復擢甲科卽授祕書省祕書郎直史館歷左拾遺知制誥加主客員外郎尋判大理寺被病遷金部郎中罷知制誥卒年五十二賜錢百萬準辭采清麗蒞官所至有聲盧多遜之獄李穆坐同門生黜免左右無敢言者準因奏事盛言穆長者有檢操

常惠多遜專恣非其黨也上寤未幾復穆官時論稱之
真宗錄其子郊祁其族子也

柳開字仲塗大名人父承翰監察御史五代文格淺弱
慕韓愈柳宗元爲文因名肖愈字紹元旣而改名字以
爲能開聖道之塗也著書目號東郊野夫又號補亡先
生作二傳以見意尚氣自任不顧小節范杲好古學尤
重開文世稱爲柳范開寶六年第進士歷宋州錄事叅
軍太宗累遷殿中侍御史因事貶上蔡令時朝廷銳意
北征開詣闕上書願效死戎行上憐之復授元職出使
河北因抗疏曰臣受非常恩未有以報今契丹未滅願

賜巨步騎數千任以河北用兵之地必能出生入死
以幽薊雖身沒戰場臣之願也上以五代以來自節鎮
主刺史皆用武臣不諳政事於是欲兼用文士以開爲
崇儀使知寧邊軍徙全州全西延洞有粟氏聚族五百
餘人常鈔劫民口糧畜開爲作衣帶巾帽選牙更勇辨
者得三輩諭降卽賦其居業作時鑑一篇刻石戒之遣
其酋入朝授本州上佐賜開錢三十萬淳化初移知桂
州坐事黜爲復州團練副使移滁州復舊官知環州二
年移邠州至州葺城壘戰具諸將多沮議不協開謂其
從子曰吾觀昴宿有光雲多從北來犯境上寇將至矣

吾聞師克在和今諸將怨我一旦寇至必危我矣卽求
換郡徙忻州刺史四年徙滄州道病首瘍卒年五十四
錄其子開善射喜奕碁有集十五卷作家戒千餘言刻
石以訓諸子性倜儻重義在大名嘗過酒肆飲有士人
在旁辭貌稍異開詢其名則至自京師以貧不克葬其
親聞王祐篤義將丐之間所費曰二十萬足矣開卽罄
所有得白金百餘兩益錢數萬遣之開兄肩吾至御史
肩吾三子湜灝沆並進士第

夏侯嘉正字會之江陵人太平興國中第進士歷官至
著作佐郎使于巴陵爲洞庭賦人多傳寫端拱初太宗

知止名召試辭賦擢爲右正言直史館兼直祕閣賜緋
魚元夕上御乾元門觀燈嘉正獻五言十韻詩其末句
云兩制誠堪羨青雲待玉輿上依韻和以賜之有狹劣
終雖舉通才列上居之句議者以爲誠嘉正之好進也
未幾被病詔以爲益王生辰使所獲金幣鬻得錢輦歸
家忽一絳自地起立良久而仆聞者異之嘉正疾遂篤
月餘卒

羅處約字思純華陽人父濟仕蜀爲升朝官歸朝至太
常丞處約嘗作黃老先天經論人多重之登第爲臨渙
主簿再遷大理評事知吳縣王禹偁知長州縣日以詩

計唱酬蘇杭間多傳誦後竝召赴闕太宗自定題試之
以禹偁爲右拾遺處約著作郎皆直史館賜緋魚會下
詔求讜言處約奏論三司之制非古莫若復尚書都省
故事其尚書丞郎正郎員外郎主事令史之屬請依六
典舊儀以今三司錢刀粟帛筦權支慶之事均在二十
四司如此則各有司存可以責其集事今則金部倉部
安能知儲廩帑藏之盈虛司田司川孰能知屯役河渠
之遠近有名無實積久生弊復就三司之中更分置僚
屬則愈失其本原矣受詔荆湖路巡撫欲以苛察立名
所奏劾甚衆淳化中卒兄賁登進士第至員外郎處約

雖有詞采而急於進用時論亦以此薄之卒後蘇易簡
王禹偁集其文凡十卷題曰東觀集易簡表上之蜀士
又有嚴儲者太平興國中進士後直史館使河北陷于
契丹

安德裕字益之一字師臯河南人父重榮晉成德軍節
度五代史有傳德裕生于真定末期重榮舉兵敗乳母
抱逃水竇中爲守兵所得執以見軍校秦習習與重榮
有舊匿養之因姓秦氏習世兵家以弓矢狗馬爲事德
裕孩提卽喜筆硯遇文字輒爲誦讀聲旣成童俾就學
遂博貫文史精於禮傳嗜西漢書習卒德裕行三年服

後還本姓習家盡以橐裝與之凡白金萬餘兩德裕却之曰斯秦氏之蓄於我何有丈夫當自樹功名以取富貴豈屑於他人所有耶聞者高之開寶二年擢進士甲科累遷金部郎中出知睦州還判太府寺咸平中卒德裕性介潔以風鑑自負王禹偁孫何皆初遊詞場德裕力爲延譽及領考試何又其首選然酣飲太過故不被獎擢有集四十卷

錢熙字太雅泉州人陳洪進嘉其才以弟之子妻之將署熙府職辭不就著楚鴈賦以見志尋復辟爲巡官專掌牋奏洪進歸朝熙不敘舊職雍熙初登甲科補虔州

觀察推官代還寇準掌吏部選上封薦熙得試中書遷
殿中丞賜緋魚著四夷來王賦以獻凡萬餘言太宗嘉
之卽以本官直史館熙嘗與楊徽之言及張洎錢若水
將被進用熙與劉昌言同鄉里相親善又語及其事昌
言因以語洎洎疑熙交構訴之熙坐削職通判朗州俄
徙衡州就改太常博士真宗卽位遷右司諫尋通判杭
州政多專達爲轉運使所奏徙通判越州熙負氣好學
善談笑精筆札狷躁務進自罷職因憤恚成疾卒嘗擬
占樂府著雜言十數篇及借刑論爲識者所許有集十
卷子蒙古亦進士及第

陳充字若虛成都人少以聲酒自娛雍熙中天府禮部奏名皆爲進士冠廷試權甲科歷刑部郎中太中祥符六年以疾出權西京留守御史臺旋以本官分司卒充詞學典贍唐牛僧孺著善惡無餘論言堯舜伯鯨俱不能慶歿及其子充因作論以及之性曠達善談謔澹於榮利自號中庸子臨終自爲墓誌有集二十卷

吳淑字正儀丹陽人父仕吳淑以校書郎直內史歸朝久不調甚窮窘以近臣薦試學士院授大理評事歷著作佐郎祕閣校理嘗獻九絃琴五絃阮頌太宗賞其優博又獻事類賦百篇詔今注釋淑分注成三十卷上之

職方員外郎疏請用古車戰法上嘉其博學淑性
靜好古有集十卷善筆札好篆籀取說文有字義者
八百餘修撰說文字義三卷又著江淮異人錄三卷
祕閣閑談五卷子安節讓夷遵路皆進士及第

舒雅字子正父仕李氏入朝歷祕閣校理與吳淑齊名
累遷職方員外郎請外得知舒州仍賜金紫雅恬於榮
宦州之潛山靈仙觀有神仙勝迹郡秩滿卽請掌觀事
東封就加主客郎中改直昭文館轉刑部在觀累年優
游山水吟詠自樂弟雄端拱二年進士

黃夷簡字明舉福州人爲錢惟治明州判官隨錢俶來

朝授從官爲倣掌書記後倣爲淮海國王封許王皆爲其府判官加倉部員外郎歸朝累遷檢校祕書監平江軍節度副使卒夷簡能文尤工詩詠老而不輟然士大夫薄其貪鄙浙右士之秀者又有盧稹謝炎許洞

盧稹字叔微杭州人幼穎悟及長曉五經大義酷嗜周易孟子端拱初登進士第調補真定東鹿主簿未及赴官卒年二十七嘗著五帝皇極志孺子問翼聖書數十篇

謝炎字化南嘉興人慕韓柳爲文與盧稹齊名時謂之盧謝稹異懦炎勁急反相厚善端拱初第進士歷知華

容公安二縣卒集二十卷

許洞字洞天吳縣人父仲容太子洗馬洞精左氏傳咸平三年進士解褐雄武軍推官嘗詣府白事有卒踞坐不起卽杖之時馬知節知州洞又移書責知節怒其狂狷不遜會洞輒用公錢奏除名歸吳中數年日以酣飲爲事常從民坊貰酒一日大署壁作酒歌數百言鄉人爭往觀其酤數倍乃盡捐洞所負景德二年獻所撰虎鈴經二十卷應洞識韜略運籌決勝科以負譴報罷就除均州參軍大中祥符四年祀汾陰獻三盛禮賦召試中書改烏江縣主簿卒有集一百卷又著春秋釋

幽五卷演玄十卷

新編卷一百六十九

宋史新編卷一百七十

列傳一百十二

明南京戶部主事莆田柯維騏著

文苑二

徐鉉 句中正 曾致堯 刁衍

姚鉉 李建中 洪湛 路振

崔遵度 陳越 穆修 石延年

劉潛附

蕭貫 蘇舜欽 尹源 黃亢

黃鑑 楊蟠 顏太初 郭忠恕

梅堯臣 江休復 蘇洵 章望之

王逢 孫唐卿

黃庠楊寅附

唐庚

兄伯虎附

文同

楊傑

賀鑄

劉涇

鮑由

黃伯思

徐鉉字鼎臣廣陵人十歲能文不安游與韓熙載齊名
江東人謂之韓徐仕吳爲校書郎仕南唐李昇及景試
知制誥宰相宋齊丘中以事貶泰州司戶掾俄復官時
景命二內臣營屯田於楚州人不堪苛細起爲盜命鉉
乘傳巡撫鉉至奏罷屯田二內臣懼逃罪鉉捕之急權
近側日及捕得賊首卽斬之坐專殺流舒州徙饒州久
之復知制誥遷中書舍人煜立歷翰林學士御史大夫
吏部尚書宋師圍金陵煜遣鉉求緩兵時煜將朱令贇

將兵十餘萬自上江來援煜以鉉旣行欲立令贊勿令東下鉉曰此行未保必能濟難江南所恃者援兵爾奈何止之煜曰方求和解而復決戰豈利於汝乎鉉曰要以社稷爲計豈顧一介之使置之度外可也煜泣而遣之及至雖不能緩兵而入見辭歸禮遇皆與常時同及隨煜入覲太祖責之聲甚厲鉉對曰臣爲江南大臣國亡罪當死不當問其他太祖嘆曰忠臣也事我當如李氏命爲太子率更令事詳五代史李景世家鉉歷左散騎常侍因事貶靜難行軍司馬初鉉至京師見被毛褐者輒哂之邠州苦寒終不御毛褐致冷疾一日晨起方

冠帶遽索筆手疏約束後事又別署曰道者天地之歸
書訖卒年七十六鉉簡淡寡欲質直無矯飾好李斯小
篆臻其妙隸書亦工嘗受詔與句中正葛湍王惟恭等
校說文弟錯亦善小學嘗以許慎說文依四聲譜次爲
十卷目曰說文解字韻譜鉉爲序親爲之篆鏤板行于
世錯字楚金李景以爲祕書省正字累官內史舍人因
鉉奉使入宋憂懼而卒李穆使江南見其兄弟文章嘆
曰二陸不能及也鉉有文集二十卷質疑論若干卷所
著稽神錄多出於客蒯亮錯所著則有文集家傳方輿
記古今國典賦苑歲時廣記云

中正字坦然華陽人孟昶時授崇文館校書郎復舉
進士及第歸朝補曹州錄事參軍汜水令又爲潞州錄
事參軍中正精於字學古文篆隸行草無不工太平興
國二年獻八體書召入授著作佐郎直史館被詔詳定
篇韻歷著作郎與徐鉉重校定說文模印頒行太宗問
中正凡有聲無字有幾何中正退條爲一卷以獻上曰
朕亦得二十一字可并錄之也時又命中正與著作佐
郎吳鉉大理寺丞楊文舉同撰定雍熙廣韻加太常博
士廣韻成凡一百卷特拜虞部員外郎淳化中累遷屯
田郎中杜門守道以文翰爲樂嘗以大小篆八分三體

書孝經摹石咸平二年表上之真宗召見便殿賜坐問
所書幾許時曰臣寫此書十五年方成上嘉歎賜金紫
命藏於祕閣特乾州獻古銅鼎狀方而四足上有古文
二十一字人莫能曉命中正與杜鎬誼驗以聞援據甚
悉卒年七十四中正喜藏書家無餘財子希古希仲竝
進士及第

曾致堯字正臣南豐人太平興國八年進士歷太常博
士性剛率好言事前後屢上章奏辭多激訐真宗卽位
累遷戶部員外郎因抗疏狂躁被黜奪金紫未幾復舊
官累遷禮部郎中坐知揚州日冒請月奉降掌昇州權

聶轉戶部郎中卒致堯頗好纂錄所著有仙島羽翼
中台志清邊前要西陲要紀爲臣要紀子易從易占皆
登進士第

刁衍字元賓昇州人父彥能仕南唐爲昭武軍節度衍
用蔭爲祕書郎集賢校理以文翰入侍甚被親昵金陵
平從李煜歸宋太祖賜緋魚授太常寺太祝稱疾假滿
屏居輦下者數歲太平興國初李昉扈蒙在翰林勉其
出仕因撰聖德頌獻之詔復本官出知睦州桐廬縣會
詔羣臣言事衍上諫刑書再遷大理寺丞獻文四十篇
召試授殿中丞通判湖州歷虞部員外郎轉運使狀其

政績優詔嘉獎徙知廬州真宗卽位遷比部員外郎掌
上䟽曰天下大器也群生衆畜也治大器者執一以正
其度保衆畜者齊化以臻其原陛下纂圖茲始布政惟
新所宜上順天心下從人欲若太祖之勤儉若太宗之
惠慈答天地敷錫之意保祖宗艱難之業則周成漢文
三宗之美不可同年而議擬也代還獻所著本說十卷
得以本官充祕閣校理出知潁州入爲比部員外郎改
直祕閣充崇文院檢討歷兵部郎中入朝暴中風眩卒
年六十九衍始仕李氏權勢甚盛父爲藩帥家富於財
被服飲膳極於侈靡歸宋以純澹夷雅知名于時恬於

陳位善談笑喜甚奕交道敦篤士大夫多推重之子湛
浚渭皆登進士第湛子繹約天聖中並進士及第

姚鉉字寶之合肥人太平興國八年進士甲科歷起居
舍人兩浙轉運使鉉佻爽頗尚氣薛狀知杭州與之不
協事多矛盾狀牒鉉罪狀以聞除名貶連州文學吉州
之萬安抵虔江有艤石舟行其中湍險萬狀鉉過感而
賦之以自兄後再移舒州又授本州團練副使卒年五
十二鉉文詞敏麗善筆札藏書至多頗有異本兩浙課
吏寫書亦薛狀所倚之一事雖被竄斥猶傭夫荷檐以
自隨有集二十卷又采唐人文章纂爲百卷目曰文粹

卒後子嗣復上其書詔授永城簿幼子稱俊穎頗善屬辭裁十歲卒鉉紀其事爲聰悟錄人多傳之

李建中字得中其先京兆人自其祖稠仕於蜀遂爲蜀人建中太平興國中進士甲科累官主客員外郎歷通判河南府知曹解潁蔡四州景德中以久次進金部員外郎建中性簡靜神風雅秀恬於榮利前後三求掌西京留司御史臺尤愛洛中風土就構園池號曰靜居好吟詠每遊山水多留題自稱巖夫民伯加司封員外郎工部郎中建中善修養預校定道藏又判太府寺卒年六十九建中善書札行筆尤工多構新體草隸篆籀八

分亦妙人多摹習嘗手寫郭忠恕汗簡集以獻皆科斗
文字有詔嘉獎好古勤學多藏古器名畫有集三十卷
子周道周上並進士及第周民太子中舍

洪湛字惟清上元人自曾祖而下皆登仕湛幼好學五
歲能爲詩未冠錄所著十卷爲齠年集舉進士有聲雍
熙二年廷試已落復試擢寘高等歷右拾遺直史館端
拱初通判壽許二州旣歸朝與左正言尹黃裳馮拯右
正言王世則宋沆伏閣請立許王元僖爲儲貳詞意狂
率太宗怒湛出知容州再遷比部員外郎知郴舒二州
咸平二年召還命試舍人院復直史館其秋命使荆湖

按視民事條奏利病甚衆還判三司都磨勘司又與王
欽若同知貢舉未幾同修起居注時議城綏州邊臣互
言利害遣湛按視湛言城之利有七而害有二遂詔營
葺終以勞人罷之湛美風儀俊辨有材幹凡五使西北
議邊要真宗有意擢任顧遇甚厚曲宴苑中賦詩不移
晷以獻深被褒賞有河陰民常德方訟臨津尉任懿納
賄登第事下御史臺坐王欽若欽若方被寵顧乃詔翰
林侍讀學士邢昺等別鞠懿易款坐湛遂削籍流儋州
事具欽若傳初王旦與欽若知舉出拜樞密副使以湛
代領其事湛之入貢院懿已試第三場畢及官收湛賦

家實無物湛素與梁顥善或假顥白金器乃取以輸宣
會赦移惠州至化州調馬騷卒湛時一子偕行甚幼州
以聞特詔賜錢二萬官護還其喪湛有集十卷子鼎大
中祥符四年進士

路振字子發祁陽人唐相巖四世孫巖貶死嶺外其子
琛避地湘潭間遂居焉振父洵美事馬希果署連州從
事謝病終于家振幼穎悟十歲聽講陰符裁百言而止
洵美俾終其業振曰百言演道足矣洵美大奇之淳化
中舉進士太宗以詞場之弊多事輕淺不能該貫古道
因試卮言日出賦觀其學術時就試者數百人咸聘貽

忘其所出雖當時馳聲場屋者亦有難色振寒素遊京師人罕知者所作賦尤爲典贍太宗甚嘉之擢宣甲科歷官左司諫知制誥振文詞溫麗屢奏賦頌爲名輩所稱詩詠多警句及居文翰之職深愜物議自是彌加精厲從祀譙毫專典綸翰牋奏填委應用無滯時推其敏贍充同修起居注嗜酒得疾卒錄其子振純厚無城府時人惜其登用之晚有集三十卷又嘗采五代末九國君臣行事作世家列傳尚未成書云

崔遵度字堅白淄州人太平興國八年第進士累遷太常丞直史館大中祥符初歷左司諫遵度與物無競計

不言是非淳澹清素於勢利泊如也掌右史十餘歲立
墀上常退居楹間慮上之見善鼓琴得其深趣所就舍
甚湫隘有小習手植竹數本朝退默坐其上彈琴獨酌
翛然自適當者琴箴其略云易有太極是生兩儀兩儀
者太極之節也四時者兩儀之節也律呂者四時之節
也晝夜者律呂之節也列宿者晝夜之節也節節相受
自細至大而歲成焉既不可使之節亦不可使之不節
氣之自然者也氣既節矣聲同則應既不可使之應亦
不可使之不應數之自然者也既節且應則天地之交
成矣文之義也或任形而著或假物而彰日星文乎上

山川理乎下動物植物花者節者五色具矣斯任形者也至於人常有五性而不著以事觀之然後著日常有五色而不見以水觀之然後見氣常有五音而不聞以弦攷之然後聞斯假物者也是故聖人不能作易而能知自然之數不能作琴而能知自然之節何則數本於一而成於三因而重之故易六畫而成卦及其應也一必於四二必於五三必於六焉氣氣相召其應也必矣卦旣畫矣故畫琴焉其應也一必於四二必於五三必於六焉節節相召其應也必矣易之書也偶三爲六三才之配具焉萬物由之而出雖曰六畫及其數也止三

而已矣琴之畫也偶六而根於一一鐘者道之所生也
五數爲一在律爲黃在音爲呂在木爲根在四體爲心
衆微由之而生雖曰十三及其節也止三而已矣卦之
德方經也著之德圓緯也故萬物不能逃其象徽三其
節經也絃五其音緯也故衆音不能勝其文世稱其知
言典記注坐謬誤降秩踰歲後之九年仁宗以壽春郡
王開府遂命與張士遜竝爲王友改戶部員外郎賜服
金紫歷禮部郎中充諮議參軍儲宮建又加吏部兼左
諭德未幾命使契丹判司農寺遵度性寡合喜讀易嘗
云意有疑則彈琴辨其數筮易觀其象無不究也夫禧

四年卒年六十七錄其二子仁宗詔贈工部侍郎又錄其孫二人有集二十卷

陳越字損之開封人祖父俱登仕越少好學尤精歷代史善屬文氣俊拔咸平中詔舉賢良策入第四等解褐將作監丞通判舒州歷擢右正言越耿桀任氣喜箴切朋友放曠盃酒間家徒壁立不以屑意然嗜酒過差平有醒日亦用是遘疾卒年四十無子越兄咸嘗舉進士未第以楊億杜鎬陳彭年言賜同三傳出身

穆脩字伯長鄆州人幼嗜學不事章句真宗東封詔舉齊魯經行之士脩預選賜進士出身調泰州司理參軍

與衆齟齬通判患之使人誣告其罪貶池州中道
三赴闕叩登聞鼓訴冤不報居貶所歲餘遇赦得釋迎
母居京師間出遊旬以給養久之補潁州文學參軍徙
蔡州卒脩剛介好論斥時病詆訕權貴人權貴人欲與
交結往往拒之張知白守亳有豪士作佛廟成知白召
脩作記記成不書上名士以五百金遺脩爲壽且求載
名于記脩投金庭下趣裝去郡士謝之絕不受曰吾寧
瀕口爲旅人終不以匪人汙吾文也宰相欲識脩且將
用爲學官脩終不往見母死自負觀以葬不飯浮屠爲
佛事脩雖窮厄然一時士大夫稱能文者必曰穆參軍

蓋異楊億劉筠聲偶之體云有集三卷

石延年字曼卿先幽州人晉以幽州遺契丹其祖舉族南走家宋城延年跌宕任氣節爲文勁健於詩最工且善書真宗錄二舉進士以爲三班奉職延年恥不就張知白素奇之曰母老乃擇祿耶延年不得已就命歷太子中允同判登聞鼓院嘗上言天下不識戰三十餘年請爲二邊之備不報及元昊反始思其言召見稍用其說延年喜劇飲嘗與劉潛造王氏酒樓對飲終日不交一言王氏怪其飲多以爲非常人益奉美酒肴果二人飲啖自若至夕無酒色相揖而去明日都下傳王氏酒

樓有二仙來飲已乃知劉石也延年雖酣放若不可撓
以世務然與人論天下事是非無不當年四十八卒官
其一子當時有魏惟儼祕演者並工詞章負氣節隱於
浮屠與延年友善歐陽脩嘗稱爲奇男子云

劉潛字仲方定陶人少卓逸有大志好爲古文起家進
士爲淄州軍事推官嘗知蓬萊縣代還過郢州方與曼
卿飲聞母暴疾亟歸母死潛一慟遂絕妻亦撫潛大號
而死同時以文學稱京東者歷城有李冠舉進士不第
得同三禮出身調乾寧主簿卒有東臯集二十卷
蕭貫字貫之新喻人俊邁能文尚氣槩舉進士甲科歷

知洪州降知饒州遷至兵部員外郎召還將試知制誥卒貫臨事敢爲不苟合於時初感疾夢綠衣中人召至帝所賦禁中曉寒歌詞語清麗人以比唐李賀

蘇舜欽字子美易簡之孫父耆有才名嘗爲工部郎中直集賢院舜欽以父任補太廟齋郎調滎陽縣尉玉清昭應宮災舜欽年二十一詣登聞鼓院上疏援五行志及劉向所論魯成公三年新宮災襄公九年春宋火二事爲諫又上書曰歷觀前代聖神之君好聞讜議然後朝無遺政物無遁情雖有佞臣邪謀莫得而進也昔晉侯問叔向曰國家之患孰爲大對曰大臣持祿而不極

諫小臣畏罪而不敢言下情不能上通此患之大者故
漢文感女子之說而肉刑是除武帝聽三老之議而江
充以族肉刑古法江充近臣女子三老愚耄踈隔之至
也蓋以義之所在賤不可忽二君從之後世稱聖況國
家班設爵位列陳豪英故當責其公忠安可教之循默
尋第進士改光祿寺主簿知長垣縣遷大理評事監在
京店宅務康定中河東地震舜欽詣匭通疏曰妖祥之
興神實尸之各以類告未嘗妄也臣竊見綱紀隳敗政
化闕失其事甚衆不可殫舉謹條大者二事一曰正心
二曰擇賢陛下身旣勤儉輔弼臺諫又皆得人則天下

何憂不治災異何由而生范仲淹薦其才召試爲集賢校理監進奏院舜欽所論議旣多侵權貴而婦父杜衍與仲淹富弼在政府多引用一時聞人欲更張庶事御史中丞王拱辰等不便其所爲會進奏院祠神舜欽與右班殿直劉巽輒用鬻故紙公錢召妓樂閒多會賓客拱辰廉得之諷其屬劾奏因欲搖動衍事下開封府劾治於是舜欽與巽俱坐自盜除名同時得罪者十餘人世以爲過薄而拱辰等方自喜曰吾一舉網盡矣舜欽旣放廢寓于吳中其友人韓維責以隔絕親交舜欽報書曰蒙開責以兄弟在京師不以義相就獨羈外數千

里自取愁苦予豈無親戚之情豈不知會合之樂也安
肯舍安逸而其愁苦哉昨在京師不敢犯人顏色不敢
議論時事隨眾上下心志蟠屈不開固亦極矣不幸適
在嫌疑之地不能決然早自引去致不測之禍粹去下
吏人無敢言友讐一波共起謗議被廢之後喧然未已
更欲寘之死地然後爲快來者往往鉤墮言語欲以傳
播好意相恤者幾希矣故閉戶不敢與相見如避兵寇
偷俗如此安可久居其間遂超然遠舉羈泊於江湖之
上不唯衣食之累實亦少避機穽也况血屬之多資人
之薄待國見之矣常相團聚可乏衣食乎不可也可閉

關常不與人接乎不可也與人接必與之言與之言必
與之還往使人人皆如持國則可不迨持國者必加釁
惡言宣布上下使僕不能自明則前日之事未爲重也
都無此事亦終日勞苦應接之不暇寒暑奔走塵土泥
淖中不能了人事羸馬餓僕日栖栖取辱於都城使人
指背譏笑哀閔亦何顏面安得不謂之愁苦哉此雖與
兄弟親戚相遠而伏臘稍足居室稍寬無終日應接奔
走之勞耳目清曠不設機關以待人心安閑而體舒放
三商而眠高春而起靜院明窓之下羅列圖史琴樽以
自愉悅有興則泛小舟出盤閫二門吟嘯覽古於江山

之間渚茶野釀足以銷憂尊鱸稻蟹足以適口又多高僧隱君子佛廟勝絕家有園林珍花奇石曲池高臺魚鳥留連不覺日暮昔孔子作春秋而夷吳又曰吾欲居九夷觀今之風俗樂善好事知子守道好學皆欣然願來過從不以罪人相遇雖孔子復生是亦必欲居此也以彼此較之孰爲然哉人生內有自得外有所適固亦樂矣何必高位厚祿役人以自奉養然後爲樂今雖僑此亦如仕宦南北安可與親戚常相守耶予窘迫勢不得如持國意必使我尸轉溝洫肉餒豺虎而後以爲安所義何其忍耶詩曰凡今之人莫如兄弟兄弟以恩急

難必相拯救後章曰喪亂既平旣安且寧雖有兄弟不
如友生謂友朋尚義安寧之時以禮義相琢磨於持
國外兄弟也急難不相救又於未安寧之際欲以義相
琢磨雖古人所不能受予欲不報慮淺吾持國也二年
得湖州長史卒年四十一舜欽數上書論朝廷事在蘇
州買水石作滄浪亭益讀書時發憤懣於歌詩其體豪
放往往驚人善草書每酣酒落筆爭爲人所傳及謫死
世尤惜之妻杜氏有賢行兄舜元字才翁爲人精悍任
氣節爲歌詩亦豪健尤善草書官至尚書度支員外郎
三司度支判官

戶源字子漸少博學彊記並第洙皆以文學知名洙議
而明辨果於有爲源自晦不矜飾有所發卽過人初以
祖蔭補官第進士歷通州涇州軍作唐說及敘兵十篇
上之其唐說略曰世言唐所以亡由諸侯之彊此未極
于理夫弱唐者諸侯也唐旣弱矣而不亡者諸侯維
之也及廣明之後關東無復唐有方鎮相侵伐者猶以
王室爲名及梁祖舉河南劉仁恭輕戰而敗羅氏內附
王鎔請盟于時河北之事去矣梁人一舉而代唐有國
諸侯莫能與之爭其勢然也向使以信昭之弱乘巢蔡
之亂而田承嗣守魏王武俊朱滔據趙燕彊相均地相

屬其勢宜莫敢先動况非義舉乎如此雖梁祖之暴不
過取霸于一方耳安能彊禪天下故唐之弱者以河北
之彊也唐之亡者以河北之弱也或曰唐之亡其由君
失道乎曰君非失道而才不至焉爾其亡也臣實主之
明皇非不欲天下如貞觀之治而馭臣之才不能勝林
甫之姦於是有祿山之禍德宗非不欲平暴亂安四方
而君人之術不能勝盧杞之邪於是有朱泚之變以至
於僖昭其心皆欲去亂而卽治也而才不逮於明皇德
宗輔臣之姦邪或過於林甫盧杞求國不亡安可得已
然迹其事君豈有失道乎故至賢之主與夫失道之主

其興其亡皆自取之此繫乎君者也中才之主其臣正勝邪則治而安邪勝正則亂而亡此繫乎臣者也然則唐之亡非君之爲臣之爲也其敎兵略曰唐之失失於諸侯之不制非失於外兵之疆故有驕將罕聞有驕兵今之失失於將太輕而外兵不足以應敵內兵鮮得其用故有驕兵不聞有驕將且唐之所失者勢也今之所失者制也勢也者不得已也制也者可爲而不爲也趙元昊寇定川堡葛懷敏發涇原兵救之源是時通判慶州遺懷敏書曰賊舉國而來其利不在城堡而兵法有不得而救者宜駐兵瓦亭擇利而後動懷敏不聽以敗

范仲淹韓琦薦其才召試學士院源素不喜賦請以論
易賦上試者方以賦進不悅其言第其文下除知懷州
卒

黃亢字清臣浦城人年十五以文謁翰林學士章得象
得象奇之遊錢塘以詩贈處士林逋逋尤激賞時王隨
知杭州奏禁西湖爲放生池亢作詩數百言士人爭傳
亢爲人侏儒不飾小節對人野率如不能言然嗜學
強記爲文詞奇偉既卒鄉人類其文號東溪集

唐卿與亢同鄉里第進士歷國子監直講同郡
楊億善其文詞由是知名累擢太常博士直集賢院以

老出通判蘇州卒

蟠字公濟章安人第進士爲密和二州推官歐陽脩稱其詩蘇軾知杭州蟠通判州事與軾倡酬居多平生爲詩數千篇後知壽州卒

顏太初字醇之彭城人顏子四十七世孫慷慨好義喜爲詩多譏切時事天聖中文宣公孔聖祐卒無子除襲封且十年是時有醫許希以鍼愈仁宗疾拜賜已西向拜扁鵲曰不敢忘師也帝爲封扁鵲神應侯立祠城西太初作許希詩指聖祐事以諷在位又致書參知政事蔡齊齊爲言於上遂以聖祐弟襲封山東人范諷石延

年劉潛之徒喜豪放劇飲不循禮法後生多慕之太初
作東州逸黨詩孔道輔深器之太初第進士歷南京國
子監說書卒著書號洙南子所居在鳧繹兩山之間號
鳧繹處士有集十卷淳耀聯英二十卷

郭忠恕字恕先洛陽人七歲能屬文舉童子及第尤工
篆籀弱冠漢湘陰公召之忠恕拂衣遽辭去周廣順中
爲周易博士建隆初坐酒失貶再削籍配隸靈武其後
流落不復求仕進多游岐雍京洛間縱酒跣弛有佳山
水卽淹留浹旬不能去或踰月不食盛暑暴露日中體
不沾汗窮冬鑿河冰而浴其傍凌漸消釋人皆異之又

三畫游王侯公卿家苟意不欲怒而去得者藏以爲寶
太宗召授國子監主簿館於太學令刊定歷代字書忠
恕性少檢敗度上憐其才每優容之益使酒肆言謗譴
時指謫官物取其直詔杖流登州行至齊州臨邑謂部
送吏曰我今逝矣因培地爲穴度可容其面俯窺焉而
卒槨葬道側後四月故人取其尸將改葬之其體甚輕
空空然若蟬蛻焉所定古今尚書并釋文並行於世
梅堯臣字聖俞宣城人用從父翰林侍讀學士詢陰爲
河南主簿堯臣工爲詩以深遠占淡爲意間出奇巧初
未爲人所知西京留守錢惟演獨嗟賞之爲忘年交引

與酬倡一府盡傾歐陽脩與爲詩友自謂不及堯臣益
刻厲精思苦學繇是知名於時宋興以詩名家爲世所
傳如堯臣者蓋少也堯臣語人曰凡詩意新語工得前
人所未道者斯爲善矣必能狀難寫之景如在目前含
不盡之意見於言外然後爲至也世以爲知言歷知襄
城縣最後監永豐倉大臣屢薦宜在館閣仁宗召試賜
進士出身爲國子監直講累遷尚書都官員外郎預修
唐書未成卒錄其子寶元嘉祐中有事郊廟堯臣預祭
輒獻歌詩又嘗上書言兵注孫子十三篇撰唐載記二
十六卷毛詩小傳二十卷宛陵集四十卷詩晚益工有

得西南夷布弓衣其織文乃堯臣詩也

休復字鄰幾陳留人自少彊學博覽爲文淳雅尤善於詩喜琴奕飲酒不以聲利爲意進士起家爲桂陽監藍山尉騎驢之官每據鞍讀書至迷失道舉書判拔萃改大理寺丞遷殿中丞獻所著書召試爲集賢校理判尚書刑部與蘇舜欽游坐預祠神會落職累遷尚書刑部郎中卒休復外簡曠而內行甚飭仁宗皇嗣未立休復著神告一篇假神告祖宗之意冀以感悟又嘗言昭憲太后子孫多流落民間宜甄錄之著唐宜鑒十五卷春秋世論三十卷文集二十卷

蘇洵字明允眉山人年二十七始發憤爲學舉進士及
茂才異等皆不中悉焚常所爲文閉戶益讀書遂通六
經百家之說下筆頃刻數千言至和嘉祐間與二子軾
轍來京師翰林學士歐陽脩上其所著文二十二篇旣
出士大夫爭傳之一時學者競效蘇氏爲文章宰相韓
琦奏于朝召試舍人院辭疾不至遂除祕書省校書郎
會太常修纂建隆以來禮書乃以爲霸州文安縣主簿
與陳州項城令姚闢同修禮書爲太常因革禮一百卷
書成方奏未報卒年五十八賜其家縑銀二百軾辭所
賜求贈官特贈光祿寺丞有文集二十卷諡法三卷

章望之字表民浦城人由伯父得象蔭爲祕書省校書郎監杭州茶庫逾年辭疾去求舉賢良方正得象在相位以嫌扼之乃上書論時政凡萬餘言不報浮游江淮間浹浹以營衣食人勸之仕不應也其兄拱之知晉江縣忤其守蔡襄怒誣以賊貶望之號泣力訴於朝時襄方貴顯事久不得直望之訴不已章十餘上卒脫拱之冤復官如初望之遂不復仕歐陽脩韓絳吳奎劉敞范鎮同薦其才除簽書建康軍節度判官不赴又除知烏程縣趣令受命固辭遂以光祿寺丞致仕卒望之喜議論宗孟軻言性善排荀卿揚雄韓愈李翱之說著救性

七篇歐陽脩論魏梁爲正統望之以爲非著明統三篇
江南人李覲著禮論謂仁義智信樂刑政皆出於禮望
之訂其說著禮論一篇其議論多有過人者嘗北游齊
趙南汎湖湘西至汧隴東極吳會山水勝處無所不歷
有歌詩雜文數百篇集爲三十卷

王逢字會之當塗人其四世祖居巖仕唐爲驍衛長史
遭亂棄官歸居青山楊行密據淮南使人以兵迫起之
居巖散遣其家人而以身歸行密授以湖州別駕不遣
一日行密大會失居巖亟使人掩其家無一人在者其
後有人於嵩山見空石室詢其旁或云有道人王居巖

韋居此莫知所往逢博學能屬文尤長於講說教授蘇州學者常數百人晚始登第歷國子監直講兼隴西郡王宅教授父之以太常博士通判徐州卒逢爲人樂易篤於朋友與胡瑗最善有易傳十卷乾德指說一卷復書七卷妻陳氏亦有賢行

孫唐卿字希元青州人少有學行與黃庠楊寘有名一時唐卿初登第通判陝州於吏事若素習丁父憂毀瘠嘔血而卒詔賻其家

黃庠字長善洪州分寧人初至京師就舉國子監開封府禮部皆爲第一比引試崇政殿以疾不時入天子遣

內侍卽邸舍撫問賜以藥劑是時庠名聲動京師所作
程文傳誦天下聞於外夷近世布衣罕比也歸江南卒
楊寘字審賢察之弟慶曆二年舉進士第一授將作監
丞通判潁州未至官持母喪病羸卒特詔賻恤其家先
是其友夢寘作龍首山人寘白謂龍首我四冠多士山
人無祿位我其終是乎已而果然

唐庚字子西丹稜人第進士爲宗子博士以張商英薦
除提舉京畿常平商英罷相庚亦坐貶後復承議郎提
舉上清太平宮歸蜀道卒年五十一庚爲文精密通於
世務作名治察言閎俗諸篇時人稱之有文集二十卷

子文若自有傳庚長兄瞻字望之後名伯虎字長孺治
易春秋皆有家法元祐三年其父游瀘南伯虎兄弟居
時喪於丹山伯虎夜半蹴庚曰吾夢收父書發之得亟
來二字吾父得無他乎吾心動矣起裹糧黎明走洪川
僦舟過江漲聲搖數十里客舟皆艤岸不敢動伯虎彷徨
堤上有漁者持小艇繫港中啗以厚利不許伯虎超
入艇中此僕夫解維漁者不得已從之二日至瀘南父
果病甚是日疾少間伯虎具舟侍父以歸居數日疾復
作遂卒元符二年庚以貢舉事繫獄臨邛語連伯虎臨
邛弁械之凡對吏逾年掠治無完膚其詞確然一不及

庚以故獄久不具卒會赦除之伯虎性真率無威儀人多易之至是皆大服以爲不可及伯虎仕於四方每數年一歸不過旬日復去後卒于家

文同字與可梓潼人漢文翁之後蜀人猶以石室名其家同方口秀眉以學名世操韻高潔自號笑笑先生善詩文篆隸行草飛白又善畫竹初不自貴重四方之人持縑素請者足相躡於門同厭之投縑於地罵曰吾將以爲韞好事者傳爲口實第進士稍遷太常博士集賢校理歷知湖州明年至陳州宛丘驛忽留不行沐浴衣冠正坐而卒有丹淵集四十卷行於世

楊傑字次公無爲人第進士元豐中禮樂之事皆預計
論嘗言大樂七失與范鎮異議哲宗卽位議樂又用范
鎮說傑復攻之鎮之樂律卒不用語在樂志元祐中爲
禮部員外郎出潤州除兩浙提點刑獄卒年七十自號
無爲子有文集二十餘卷樂記五卷

賀鑄字方回衛州人喜談當世事可否不少假借人以
爲近俠博學強記工語言深婉麗密如次組繡尤長於
度曲掇拾人所棄遺少加嚼括皆爲新奇嘗言吾筆端
驅使李商隱溫庭筠常奔命不暇諸公貴人多客致之
苟所不欲見終不貶也初娶宗女隸籍右選監太原工

作是時江淮間有米芾以魁岸奇謫知名二人每相遇
瞋目抵掌論辨鋒起終日不能屈談者傳爲口實元祐
中換通直郎通判泗州又倅太平州竟以尚氣使酒不
得美官悒悒不得志食祠祿退居吳下稍務引遠世故
亦無復軒輊如平日家藏書萬餘卷手自校讎所爲詞
章往往傳播人口黃庭堅自黔中還得其江南梅子之
句以爲似謝玄暉自哀歌詞名東山樂府嘗自言知章
之後且推本其初出王子慶忌以慶爲姓居越所謂鏡
湖者本慶湖也避漢安帝父清河王諱改爲賀氏慶湖
轉爲鏡故鑄自號慶湖遺老有集二十卷

劉涇字巨濟楊安人第進士王安石薦於神宗召見除
經義所檢討久之爲太常博士罷知咸陽縣歷國子監
丞知處號真坊四州元符末上書召對除職方郎中卒
涇爲文務奇怪好進取多爲人排斥同時有鄭少微者
字明與涇俱以文名而仕不偶

鮑由字欽止龍泉人第進士其文汪洋閎肆詩尤高妙
徽宗召對除工部員外郎居無何以不合去歷知海州
奉祠卒嘗註杜甫詩有文集五十卷

黃伯思字長睿履之孫饒州司錄應求之子風韻洒落
飄飄有凌雲意以履任爲假承務郎元符三年進士高

等伯思好古文奇字遂以名家初淳化中博求古法書
續正法帖伯思病其垂僞庵雜考引載籍作刊誤二卷
由是篆隸正行草章草飛白皆至妙絕得其尺牘者多
藏奔歷祕書郎縱觀冊府藏書至忘寢食自六經及子
史百家天官地理律曆卜筮之說無不精講凡詔講明
前世典章文物集古器考定真贗以素學與聞議論發
明居多館閣諸公自以爲不及也頗好道家自號雲林
子別字霄賓政和中卒年四十伯思學問慕揚雄詩慕
李白文慕柳宗元有文集五十卷翼騷一卷